

CONVENIO DE COLABORACIÓN ENTRE O SERVIZO GALEGO DE SAÚDE E A FUNDACIÓN "MONTE DO GOZO" PARA O DESENVOLVEMENTO DO PROGRAMA TERAPÉUTICO-EDUCATIVO "PROXECTO HOME" DE ATENCIÓN INTEGRAL DE PERSOAS EN RISCO E CON TRASTORNOS ADICTIVOS DA COMUNIDADE AUTÓNOMA DE GALICIA E DO PROGRAMA DE TRATAMENTO E REHABILITACIÓN, EN RÉXIME DE COMUNIDADE TERAPÉUTICA, DA DEPENDENCIA ALCOHÓLICA

MEMORIA XUSTIFICATIVA

O xerente do Servizo Galego de Saúde, **DECLARA:**

Que o Servizo Galego de Saúde asinou o 18.03.2026 coa Fundación Monte do Gozo o convenio arriba referido. O prazo de vixencia deste convenio será dende o día seguinte ao da súa sinatura até o 31 de decembro de 2026.

Que o instrumento convencional ten por obxecto a colaboración entre o Servizo Galego de Saúde e a Fundación "Monte do Gozo" para o desenvolvemento dos programas relacionados anteriormente, prestando así servizos sanitario-asistenciais a persoas con problemas derivados do consumo de drogas, atendendo aos principios de anonimato, universalidade e gratuidade de asistencia.

A prestación dos ditos servizos lévase a cabo nas estruturas coas que conta Proxecto Home Galicia, baseado nun modelo teórico de intervención marco deseñado como unha consecución de fases para acadar a rehabilitación e inserción sociolaboral das persoas en tratamento:

- Avaliación e diagnose
- Motivación e integración
- Coñecemento e desenvolvemento persoal
- Inserción sociolaboral

A prestación destes servizos lévase a cabo en dispositivos emprazados en centros de acollida, e cinco comunidades terapéuticas (unha delas intrapenitenciaria):

A duración do tratamento varía dependendo do programa e, en grande medida, da evolución da persoa en tratamento, pero pode establecerse entre os 18 e os 20 meses.

Os pacientes poderán ser derivados polas unidades da rede de saúde mental e drogodependencias do Servizo Galego de Saúde co visto e prace do responsable de saúde mental da área correspondente.

As persoas usuarias contarán cun programa de tratamento actualizado que atenda as súas circunstancias de saúde e sociais, introducindo aqueles aspectos necesarios para dar respostas aos colectivos de maior vulnerabilidade e atendendo á perspectiva de xénero no desempeño das súas actividades.

Co fin de acadar unha maior concienciación nesta materia por parte da cidadanía e de mellorar a formación dos profesionais implicados no tratamento destes pacientes, o equipo asistencial colaborará no desenvolvemento e deseño do Plan Anual de Formación previsto no Plan de Trastornos Aditivos da Comunidade Autónoma.

Que o convenio fundaméntase no seguinte:

O Servizo Galego de Saúde, a través da Dirección Xeral de Asistencia Sanitaria, ocúpase da xestión, planificación e coordinación das medidas e accións dirixidas a facilitar a prestación de servizos asistenciais e a promover a incorporación social de pacientes relacionados con substancias e outros trastornos adictivos.

Segundo o establecido no Decreto 144/2024, do 20 de maio, polo que se establece a estrutura orgánica do Servizo Galego de Saúde, a Dirección Xeral de Asistencia Sanitaria, a través da Subdirección Xeral de Atención á Saúde Mental, é a responsable de desenvolver as actuacións sanitarias en relación coa saúde mental nos centros sanitarios, así como a rede de centros de drogodependencias, e de impulsar a cooperación e coordinación cos órganos ou unidades da administración xeral da comunidade autónoma de Galicia competentes en materia de servizos sociais, de cara a fomentar o desenvolvemento e a integración das prestacións sociosanitarias.

De conformidade co artigo 16.1 da Lei 2/1996, do 8 de maio, de Galicia sobre Drogas, os poderes públicos da Comunidade Autónoma Galega garantirán, nas mesmas condicións que o resto da poboación, o proceso de atención ó drogodependentes nos servizos sanitarios e sociais, respectando os dereitos e as obrigas que establece a normativa básica e autonómica nesta materia. Neste mesmo sentido, o artigo 18.1 recolle que as administracións públicas de Galicia velarán polo desenvolvemento das actividades asistenciais precisas para o tratamento dos diversos problemas derivados do consumo de drogas, a desintoxicación, a deshabitación-rehabilitación e a atención ás complicacións orgánicas, psíquicas e sociais e ás urxencias derivadas do uso das drogas.

Co obxecto de garantir as prestacións adecuadas, a administración autonómica, no marco das súas competencias, poderá establecer acordos, convenios, contratos ou concertos con entidades tanto públicas coma privadas, preferentemente con aquelas que non teñan ánimo de lucro.



O convenio formalizouse coa Fundación "Monte do Gozo", que é a promotora de Proxecto Home Galicia, e desenvolve unha serie de programas de intervención dirixidos á rehabilitación e inserción sociolaboral de persoas adictas.

A fundación está inscrita no Rexistro de Entidades Colaboradoras do Plan de Galicia sobre Drogas, creado polo Decreto 74/2002, do 28 de febreiro, garantindo así a súa plena capacidade e acreditación para desenvolver programas especializados de atención a persoas con adiccións.

Esta entidade desenvolve unha actividade asistencial de carácter esencial e continuado, prestando atención directa a pacientes con trastornos relacionados co consumo de substancias e con trastornos adictivos, colectivos que requiren unha intervención estable, ininterrompida e especializada.

Ademais, dentro da súa actividade desenvólvense programas de intervención de asistencia sanitaria especializada dende un enfoque biopsicosocial a persoas con trastornos relacionados con substancias e outros trastornos adictivos na Comunidade Autónoma galega.

A poboación destinataria destes programas é especialmente vulnerable, ao tratarse de persoas con trastornos aditivos, o que incrementa a súa exposición á exclusión social, aos riscos de reincidencia e á dificultade de acceso aos recursos públicos e comunitarios.

A especificidade técnica esixe equipos profesionais altamente cualificados, con formación e experiencia acreditada na atención a persoas vulnerables con adiccións, así como mecanismos estables de coordinación cos recursos públicos implicados.

As actuacións obxecto do convenio responden a razóns de interese público de carácter social, sanitario, económico e humanitario, ao dirixirse a un colectivo especialmente vulnerable, que require dunha atención especializada e continuada para garantir a súa integración social, a redución de riscos asociados á súa situación e a protección da súa dignidade.

Concorren tamén razóns de interese económico, ao contribuír estes programas á redución da reincidencia, á diminución dos custos derivados tanto do sistema sanitario como xudicial e penitenciario, e á optimización dos recursos públicos mediante intervencións preventivas e de reinserción social eficaces.

Desde unha perspectiva humanitaria, resulta esencial proporcionar unha atención respectuosa cos dereitos fundamentais ás persoas destinatarias e favorecedora de procesos reais de recuperación persoal e integración comunitaria.

Os programas obxecto do convenio veñen desenvolvéndose de forma continuada no marco da Rede de Incorporación Social do Plan de Galicia sobre Drogas, constituíndo actuacións plenamente integradas e consolidadas nas políticas públicas autonómicas en materia de drogodependencias e inclusión social.



A Fundación Monte do Gozo dispón dos medios técnicos necesarios e ten capacidade de coordinación das asociacións que actúan na correspondente área sanitaria, o que garante o desenvolvemento dos programas segundo o catálogo de programas asistenciais do Plan Galego sobre Drogas.

A interrupción destas actuacións suporía un prexuízo directo para as persoas destinatarias, incrementando a súa vulnerabilidade e comprometendo a eficacia dos procesos de intervención en curso e os obxectivos de interese público, social e humanitario perseguidos.

A formalización do convenio baséouse polo tanto en consideracións derivadas do interese sanitario, social e humanitario, así como en razóns de eficacia e falta de medios do Servicio Galego de Saúde, que non podería desenvolver directamente estes programas.

A colaboración do Servicio Galego de Saúde realízase mediante a achega dunha subvención que se concede de forma directa á Fundación Monte do Gozo, de acordo co establecido no artigo 19.4 a) da Lei 9/2007, de 13 de xuño, de subvencións de Galicia, no que se recolle que poderán concederse de forma directa as subvencións previstas nominativamente nos orzamentos da Comunidade Autónoma, sendo os convenios o instrumento habitual para canalizar as mesmas.

O financiamento do presente convenio está prevista nos Orzamentos da Xunta de Galicia para o ano 2026, cunha partida específica para esta fundación de un millón douscentos corenta e cinco mil cento dezanove euros (1.245.119,00 €) dentro do Plan Galego de Asistencia ás Adiccións, o que garante a cobertura económica dos programas e reforza o compromiso institucional coa súa continuidade, garantindo así o adecuado financiamento das actuacións especializadas.

Esta contía supón un incremento do 2% respecto do convenio asinado en 2025 con esta mesma entidade, por mor do incremento do gasto corrente no que previsiblemente incorrerá a entidade, tal e como consta na memoria xustificativa achegada por esta.

A prestación dos servizos por parte da entidade comporta a necesidade de asumir, desde o inicio de cada exercicio, gastos estruturais fixos, fundamentalmente vinculados a persoal especializado, programas terapéuticos e funcionamento dos dispositivos asistenciais.

Respecto do convenio anterior, increméntase así mesmo a porcentaxe de anticipo ao 70 %, atendendo ás circunstancias concorrentes e á experiencia derivada de exercicios anteriores nos que o convenio contemplaba un pagamento anticipado do 30 %.

A entidade trasladou á Administración dificultades de tesouraría e problemas de solvencia transitoria, derivados da insuficiencia de financiamento inicial para afrontar os gastos necesarios para a continuidade do servizo, solicitando expresamente a ampliación da porcentaxe de anticipo. Estas circunstancias puxeron de manifesto que o anticipo inicialmente previsto resultaba insuficiente para garantir a adecuada execución das actuacións e a continuidade



asistencial, xerando tensións financeiras que podían afectar ao normal desenvolvemento dos servizos prestados.

No convenio para 2026, engádese así mesmo como novidade a necesidade de entrega, por parte da entidade, de contas xustificativas acompañadas de informe de auditoría, modalidade de xustificación prevista na normativa de subvencións de Galicia, ao considerar que aporta unha maior seguridade xurídica, transparencia e eficiencia na xestión de fondos públicos, facilitando procedementos de control e avaliación externos.

Facilítase así a necesaria xustificación dos gastos tanto de xeito interno para a entidade, como para o necesario control previo ao pagamento do órgano xestor.

O número estimado de persoas beneficiarias directas para o ano 2026 é de 600.

Tendo en conta todo o anterior, e conforme o previsto no artigo 26.2 a) da Lei 9/2007, de 13 de xuño, de subvencións de Galicia, estimouse debidamente xustificado non promover a concorrência pública para a implantación dos programas de intervención de asistencia sanitaria especializada obxecto deste convenio, pola súa elevada especificidade técnica, a vulnerabilidade da poboación destinataria, a continuidade das actuacións, as finalidades específicas de atención integral, coordinación e asesoramento, e a existencia de financiamento previsto nominativamente nos Orzamentos da Xunta de Galicia para o ano 2026.

Por todo o exposto, formalizouse un convenio de colaboración entre o Servizo Galego de Saúde e a Fundación Monte do Gozo, por un importe de un millón douscentos corenta e cinco mil cento dezanove euros (1.245.119,00 €) con cargo á aplicación orzamentaria 5001.413A.481.04, co código de proxecto 2022 00002, consignada nominativamente nos orzamentos xerais da Comunidade Autónoma de Galicia para o ano 2026.

Os intereses converxentes das partes asinantes exclúen o ánimo de lucro, e non podían satisfacerse axeitadamente mediante a celebración dun contrato dos contemplados na Lei 9/2017, do 8 de novembro, de Contratos do Sector Público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estimouse xustificado o recurso á sinatura do instrumento convencional, con exclusión doutras figuras.

E para que conste, asínase esta memoria, en Santiago,

